



Komunikadu Imprensa **Munisipíu Covalima** **25 Juñu 2019**

JSMP kontinua fahe informasaun kona-ba Protesaun Direitu Labarik no Asesu ba Justisa

Iha 18 Juñu 2019, JSMP realiza treinamentu ba *Komunidade Suku Ogues, Sub-distritu Maukatar Munisipíu Covalima*. Komunidade sira ne'ebé partisipa iha treinamentu ne'e hamutuk ema na'in 20, fetu na'in 12 no mane na'in 8. Partisipante sira ne'e mai hosi xefe aldeia hosi aldeia 5, delegada/reprezentante fetu, comunidade no Xefe Suku rasik.

“Treinamentu ne'e ho objetivu atu hasae koñesimentu comunidade sira liu-liu representante comunidade sira hosi kada aldeia liu-liu xefe aldeia sira atu hatene kona-ba direitu labarik sira nian, fó protesaun espesial ba labarik sira no oinsa asesu ba sistema justisa formál kuandu labarik sira konfliktu ho lei,” dehan Diretór Interinu JSMP, Sr. Casimiro dos Santos.

Iha abertura treinamentu ne'e, Xefe Suku Ogues, Sr. Faustino de Araújo haktuir katak nia parte kontente no agradece ba JSMP tanba bele fasilita treinamentu ida ne'e ba membru lideransa comunidade suku Ogues no comunidade sira atu hatene labarik sira nia direitu no oinsa lori ba iha Justisa formál kuandu labarik sira hasoru problema. Iha enseramentu xefe suku ne'e fiar katak ho treinamentu ne'e partisipante sira hatene ona saida mak direitu labarik sira nian, oinsa fó protesaun ba labarik sira no hatene ona dalan atu lori labarik sira nia problema ba justisa formál kuandu labarik sira hetan violénsia, diskriminasaun no tratamentu ladiak sira iha comunidade.

Xefe Suku mós husu ba partisipantes sira, liu-liu Xefe aldeia, delegada/reprezentante fetu no partisipante sira hotu atu kontinua habelar informasaun sira ne'e ba comunidade sira ne'ebé la hetan oportunidade tuir treinamentu ida.

Treinamentu ne'e hetan partisipasaun másimu hosi partisipantes sira no hato'o sira nia preokupasaun kona-ba labarik sira nia direitu liga ho responsabilidade inan-aman sira nian no oinsá atu asesu ba sistema justisa formál kuandu inan aman la kumpri sira nia obrigasaun sira.

Hatan ba preokupasaun sira ne'e, JSMP resposta katak labarik sira hetan direitu espesial hosi familia, sosiedade no estadu tanba labarik sira fizikamente no emocionalmente seidauk maduru, seidauk iha kapasidade atu hola desizaun no seidauk bele proteje sira nia-an. Inan-aman iha obrigasaun atu hakiak, fó-han (alimentasaun), tau-matan, proteje hosi risku, la halo diskriminasaun no fó oportunidade atu sira dezemvolve sira nia-an tuir sira nia kapasidade.

Entretantu kestaun kona-ba aman ne'ebé la tau matan (abandona) nia oan sira, JSMP esplika katak inan-aman iha obrigasaun atu fó alimentasaun ba nia oan sira maibé karik iha labarik ruma

ne'ebé aman la tau matan/la fó alimentu, tanba aman ne'e husik tiha nia feen no oan sira no ba hola fali feto seluk, JSMP esplika katak ita nia lei sivíl fó obrigasaun ba aman ka inan atu kuidadu no fo alimentu ba nia oan sira se aman ka inan la kumpri nia obrigasaun ne'e, nia sei hatan ba krime ida naran krime la halo tuir obrigasaun alimentár iha artigu 225 KP ne'ebé nia kastigu kiik liu mak loron 30 prizaun no boot liu tinan 3 prizaun ka sei selu multa ba Esdatu. Kona-ba ezersísio pódor paternal tuir artigu 1758 Kódigu Sivíl, inan-aman iha dever tuir interese diak oan sira nian atu asegura seguransa no saúde diak oan sira nian, hare'e ba sira nia edukasaun, representa sira no administra sira nia riku-soin.

Enkuantu kestaun kona-ba labarik sira ne'ebé konfliktu ho lei (labarik sai vítima ka arguidu) JSMP esplika katak kuandu labarik sira sai vítima, artigu sira ne'ebé fó protesaun mak hanesan krime maus tratus ba menór (tratamentu aat ba labarik) tuir artigu 155 KP, krime koasaun seksuál ho agravaasaun iha artigu 171 KP konjuga ho artigu 173 alinea (d) KP, krime violasaun ho agravaasaun iha artigu 172 KP konjuga ho artigu 173 alinea (d) KP, krime prostituisaun infantil 175 KP, krime pornografia infantil iha artigu 176 KP, abuzu seksuál ba menór iha artigu 177 KP, krime aktu seksuál ho adolexente iha artigu 178 KP, krime interrupsaun ba grávida iha artigu 141 KP no krime infantisídiu iha artigu 142 KP.

Kona-ba labarik sira sai arguidu, artigu ne'ebé fó protesaun mak artigu 20 KP kona-ba inimputabilidade tanba idade labele tula responsabilidade kriminál ba labarik sira ne'ebé seidak iha idade tinan 16 tanba ho razaun labarik sira seidak maduru, seidak iha kapasidade atu foti desizaun ruma no menus komprensaun kona-ba konsekuensia hosi sira nia hahalok ne'ebé sira halo.

JSMP observa katak atividade treinamentu ne'e lao ho diak no partisipante sira mós ativu husu perguntas no fahe sira nia esperensia moris iha família no sociedade.

Treinamentu ne'e realiza tanba hetan apoiu finanseiru hosi Hivos.

Atu hetan informasaun liutan favor kontaktu direktamente:

Casimiro dos Santos

Diretór Interinu JSMP

Diresaun e-mail: santos.cas76@gmail.com

Website : <http://jsmp.tl/>